

Plaschairs e quitads en l'ura da dumondas

Da las tractativas dal cussegl grond

■ **(anr/fa) La regenza renconuscha e sa stgisa per las mesiras sfurzadas per motivs da provediment avant l'onn 1981. Ella ha er infurmà davart l'intenziun d'introducir en Svizra numers minimals da cas tractads en ils ospitals.** A chaschun da l'ura da dumondas ha menziunà Vera Stiffler (pld, Cuira) la rolla pauc gloriosa dal chantun Grischun en connex cun il piazzament d'uffants per mesiras da provediment.

«Il Grischun era in dals emprims chantuns che ha piazzà uschenumnads 'Liederliche und Arbeitsscheue' en la praschun a Realta. Fin al cumenzament dals onns 1980 ha il chantun piazzà uffants en autras instituziuns», ha ella constatà e dumandà la regenza sch'ella vegnia a renconuscher ils entiers fatgs envers las victimas da las Mesiras per motivs da provediment e piazzaments dador famiglia (MSMP).

Pertutgads ed experts vegnan a collavurar

«Da primavaira è entrada en vigur la lescha davart l'elavuraziun da las MSMP avant l'onn 1981, il chantun Grischun è ussa londervi ad implementar questa lescha», ha respundì cusseglier guvernativ Jon Domenic Parolini, «la regenza ha gia dal 2014 decis da laschar perscrutar sut la direzziun da Tanja Rietmann scientificamain quest toc d'istorgia grischuna ed ha ussa decis da nominar ina gruppada pertutgads ed experts.» Quels han

l'incumbensa da far propostas per in segn, in simbol per demonstrar la renconuschientscha per las victimas da questas mesiras repressivas. Enpli ha il Grischun era previs ina contribuziun al fond da solidaritad federal. «La regenza vegn a communitgar sia decisiun sco era la sort dal simbol da commemoraziun, da stgisa e da renconuschientscha en in rom degn.» Questa infurmaziun nun ha fatg plaschair mo a Vera Stiffler, mabain er a pertutgads ch'eran preschents venderdi sin la tribuna dal cussegl grond.

«Effects desastrus per il provediment da sanadat decentral»

Alessandro Della Vedova (pcd, Poschiavo) ha dumandà tge che la confederaziun prevesia da far en connex cun ils ospitals en Svizra. Cusseglier guvernativ Christian Rathgeb ha ditg che quella haja l'intenziun da cumbinar las prestaziuns finanzialas als ospitals a la cundiziun ch'els tractian almain in numer minimal da cas. «Sche la confederaziun introduciss quest numer minimal en quella quantidad sco previs da la direzziun da sanadat dal chantun Turitg metess quai en dumonda tut il concept dal provediment da sanadat decentral dal chantun Grischun», ha punctuà Rathgeb e ditg ch'il chantun vegnia ad exprimer en occasiun da la consultaziun sin plaun federal cleramain ses quitads per ils ospitals grischuns en las regiuns periferas e per las piazzas da lavur colliadas cun quels.